

四庫全書

子部

欽定四庫全書

名賢氏族言行類稿卷四十九

宋 章定 撰

陸 九百五三

北史陸通字仲明吳郡人位大司馬綏德郡公 弟逞
字季明謹密早有名譽幹識詳明歷任三府所在著
績報使於齊善辭令敏而有禮齊人稱焉

陸知命字仲通通識大體性好學為太學博士

唐陸元方字希仲蘇州人初明經後舉八科皆中轉監
察御史武后時使嶺外涉海風濤舟人懼元方曰吾
受命不私神豈害我趣使濟而風訖息擢天官侍
郎薦引皆親黨后怒元方薦人如初后讓之對曰舉
臣所知不暇問讎黨又薦其友崔玄暉有宰相才后
知無他復拜鸞臺侍郎同平章事素清慎臨終取
奏稿焚之曰吾陰德在人後當有興者

陸象先元方子器識沈邃舉制科高第時吉頊與元方

同為吏部侍郎吉頊擢象先為洛陽尉元方不肯吉
頊曰為官擇人豈以吏部子廢至公邪 景雲中進
同平章事初太平公主謀引崔湜為宰相湜曰象先
人望宜幹樞近主為言之遂並知政事性恬靜議論
高簡湜嘗曰陸公加於人一等公主謀逆為主所進
者將同誅玄宗召免之曰歲寒然後知松柏之後凋
也封兗國公罷為劍南按察使徙河東小吏有罪誠
遣之大吏白爭以為可杖象先曰人情大抵不相遠

謂彼不曉吾言耶必責者當以汝為始大吏慙退嘗曰
天下本無事庸人自擾之耳遷太子太保始象先
名景初睿宗曰子能紹先是謂象賢者乃賜名焉

陸景倩為扶溝丞河南按察使畢構覆州縣殿最欲必
實有吏言狀曰某彊清某詐清惟景倩曰真清終監
察御史 景倩象先弟也

陸餘慶陳右衛將軍珣孫方雅有祖風已冠名未顯兄玄
表喈曰爾名宦不立奈何餘慶感激閉戶誦書三年舉

制策甲科累遷殿中侍御史鳳閣舍人開元初為河
南河北安撫使薦孫逖達奚珣等後皆為知名士遷大
理卿終太子詹事諡曰莊雅善趙貞固盧藏用陳子
昂杜審言宋之問畢構郭襲微司馬承禎釋懷一一
時號方外十友

陸長源吳人贍於學為汝州刺史宣武司馬清白自將
既代州送車二乘曰吾祖罷魏州有車一乘而圖書
半之吾愧不及先人云

陸贄字敬輿嘉興人十八第進士中博學宏辭調鄭尉
張鎰有重名贄往見語三日奇之請為忘年交既行
餉百萬曰請為母夫人一日費贄不納止受茶一串

德宗立遣黜陟使庾何等十一人行天下贄說使
者請以五術省風俗八計聽吏治三科登雋又四賦
經財費六德保罷瘵五要簡官事時皆韙其言遷
監察御史召為翰林學士會馬燧討賊河北久不決
請濟師李希烈寇襄城詔問策安出贄言勞於服遠

莫若修近多方救失莫若改行又奏議論關中事宜
狀帝不納後涇師變贄言皆效從狩奉天機務填
總遠近調發詔書日數百贄若不經思建成皆周盡
事情它學士閣筆不得下贄沛然有餘始帝倉卒變
故每自尅責贄曰陛下引咎堯舜意也然致寇者乃
羣臣罪贄意指盧杞等退而上書又奏議請數對
羣臣兼許令論事會興元赦令方具帝以稿付贄使
商討其詳贄知帝執德不固困則思治泰則易驕欲

激之使彊其意即建言云云帝納之始帝播遷府藏委棄衛兵無褚衣至是天下貢奉稍至乃於行在署瓊林大盈二庫別藏貢物贄諫云云帝悟即撤其署李懷光有異志帝遣見懷光議事還奏懷光必反宜有以制之後懷光果奪兩節度兵行在震驚遂徙幸梁道有獻瓜菓帝嘉其意欲授以試官贄奏議云云俄以勞遷諫議大夫仍為學士京師已平帝欲詔渾瑊訪奔亡內人給裝使赴行在贄諫曰云

云 貞元七年以兵部侍郎知貢舉明年竇參黜乃
以中書侍郎同平章事 贄秉政始請臺閣長官得
自薦其屬有不職坐舉者 舊制吏部選以歲集乾
元後天下兵興率三年一調吏員稽壅廢置無綱至
十年不被調者缺員或累歲不補贄乃請每歲計闕
集人天下便之 陳防秋之弊帝愛重其言然卒不
從也 班宏判度支卒官贄薦李巽帝用裴延齡贄
上書苦諫延齡不可用帝不懌 始入翰林年尚少

以材幸天子常以輩行呼而不名在奉天朝夕進見
然小心精潔未嘗有過帝依任之至解衣衣之參裁
可否時號內相 嘗為帝言今盜徧天下宜痛自咎
悔以感人心帝從之故奉天所下詔書雖武人悍卒
無不感動流涕李抱真入朝為帝言陛下在奉天時
赦令至山東士卒聞者皆感涕思奮議者謂興元戡
難功雖爪牙宣力蓋贄有助焉 狩山南也道險澁
與從官相失夜召贄不得帝驚且泣久之上謁帝喜

見顏間及輔政不敢自顧重事有可否必言之懇到
深切或規其太過對曰吾上不負天子下不負所學
逞他卹乎 既放荒遠闔戶人不識其面又避謗不
著書地苦瘴癘祇為今古集驗方五十篇示鄉人云
陸質字伯沖明春秋師事趙啖盡傳二家學門人以質
能文聖人書通於後世私共謚曰文通先生

陸宸字祥文擢進士第二屬辭敏速若注射一時書命
同僚自以為莫及昭宗優遇之帝嘗作賦詔學士皆

和獨展先就帝覽之歎曰貞元時陸贄吳通玄善內
廷文書後無繼者今朕得之 韓偓謂展豈有它腸
陸羽字鴻漸不知所生或言僧得諸水濱畜之既長以
易自筮得蹇之漸曰鴻漸於陸其羽可用為儀乃以
陸為氏名而字之上元初隱苕溪自稱桑苧翁時謂
今接輿也嗜茶著經三篇言茶之原之法之具後著
毀茶論

陸龜蒙字魯望舉進士不中居松江甫里多所論撰身

畚鍤迄無休時或譏其勞答曰堯舜黜瘠禹胼胝彼
聖人吾一褐衣敢不勤乎 嗜茶又不喜與流俗交
雖造門不肯見齋書茶釣具等往來時謂江湖散人
或號天隨子甫里先生自比涪翁漁父江上丈人後
以高士名不至 陸氏在姑蘇其門有巨石遠祖績
嘗仕吳為鬱林太守

陸元朗字德明吳人善名理高祖已釋奠召徐文遠浮
屠慧乘道士劉進喜各講經德明隨方立義偏析其

要帝喜曰三人誠辯然德明一舉輒蔽可謂賢矣

宋朝陸佃字農師越州山陰人也舉進士稍遷集賢校理崇政殿說書同修起居注拜中書舍人給事中遷吏部侍郎請外以龍圖閣待制知潁州至徽宗即位召為吏部侍郎修哲宗實錄遷尚書拜尚書右丞

御史中丞趙挺之以論事不當罰金佃曰中丞不可罰罰則不可為中丞其後諫官陳瓘上書曾布言其尊私史而壓宗廟帝怒佃曰瓘書雖無取不必深怒

若不能容是成其名也遷尚書左丞佃執政薦拔人材多恬退者後以中大夫知亳州卒

宿 九百五四

姓纂伏羲氏風姓之後左傳云任宿須句顓臾風姓也宿國在東平無鹽縣以國為姓

北史宿石朔方人曾祖文陳父子歸魏拜上將軍祖若豆根明元時賜姓宿氏石尚公主拜駙馬都尉位吏部尚書

穆

九百五十五

姓纂宋穆公之後支孫氏焉漢楚元王友有穆生或

作繆

亦音穆

河南代人本姓丘目陵氏代為部落大

人為北人八族之首

後魏以穆陸奚子比漢金張

許史孝文遷洛陽改為穆氏以位盡王公勲著當代

下司州一同四姓

北史穆崇代人也從魏道武平中原位侍中豫州刺史
穆觀字闡拔少以文藝知名魏太武監國觀為右弼出

則統攝朝政入則應對左右事無巨細皆關決焉終日怡怡無愠喜色勞謙善誘不以富貴驕人

唐穆寧懷州人剛正氣節自任上元初為侍御史佐鹽鐵轉運住堽橋李光弼屯徐州餉不至檄取資糧寧不與光弼怒答曰命寧主糧者敕也公可以檄乎時重其能守官大厯初為和州刺史治有狀召拜太子右諭德居家嚴事寡姊恭甚嘗譔家令訓諸子人一通又戒曰君子之事親養志為大吾志直道而已

苟枉而道三牲五鼎非吾養也疾病不當藥時稱知
命以祕書監終 四子贊質員賞 寧之老贊為御
史中丞質右補闕員侍御史賞監察御史皆以守道
行誼顯先是韓休家訓子姪至嚴貞元間言家法者
尚韓穆二門云兄弟皆和粹世以珍味目之贊少俗
然有格為酪質美而多入為酥員為醍醐賞為乳腐
宋朝穆修字伯長汶陽人也師事陳搏而傳其易學少
豪放舉進士調海州理掾修恃才嘗忤監郡者由是

据撫其罪坐削籍隸池州遇赦叙潁州文學參軍故
當時稱之曰穆參軍修性剛介張知白守毫毫有豪
士作佛廟成知白使人召修作記記成不書士名士
以白金五百為壽求載名修投金庭下趣裝去宰相
欲識修且將用為學官終不往見自五代文敝國初
柳開始為古文其後楊億劉筠尚聲偶之詞天下學
者靡然從之修獨以古文稱蘇舜欽兄弟從之遊

祝

九百五十六

姓纂黃帝之後周武王封黃帝之胄於祝因氏焉鄭
有祝聃衛有祝鮒或謂祝史之後以官為姓

左傳昭十六年鄭大旱使祝欸豎柎有事於桑山 二
十年公孟有事於蓋獲之門外齊子氏帷於門外而
伏甲焉使祝鼂寘戈於車薪以當門

論語祝鮒治宗廟

唐祝欽明字文思京兆人擢明經永淳天授間中英才傑
出業與六經等科中宗在東宮欽明兼侍讀授太子

經中宗復位擢國子祭酒同中書門下三品進禮
部尚書封魯國公桓彥範崔玄暉袁恕已敬暉等
皆從受周官大義朝廷尊之 帝與羣臣宴欽明自
言能八風舞帝許之盧藏用歎曰是舉五經掃地矣
欽明于五經為該淹終崇文館學士

卜 九百五七

姓纂周禮卜人氏以官

史記卜商字子夏

家語云衛人鄭
玄曰渢國卜商

少孔子四十四歲子

夏問巧笑倩兮美目盼兮素以為絢兮何謂也子曰
繪事後素曰禮後乎孔子曰商始可與言詩已矣子
貢問師與商也孰賢子曰師也過商也不及然則師
愈與曰過猶不及子謂子夏曰女為君子儒無為小
人儒孔子既没子夏居西河教授為魏文侯師

漢卜式河南人以田畜為事獨取畜羊百餘田宅財物
盡與弟入山牧十餘年羊致千餘頭買田宅 上書
願輸家財半助邊復持錢二十萬與河南太守以給

徙民乃召拜式為中郎上曰吾有羊在上林中欲令
子牧之歲餘羊肥息上過其所善之式曰非獨羊也
治民亦猶是矣拜齊王相賜爵關內侯

束九百五十八

姓纂晉書云踈廣之後曾孫孟達避王莽亂自東海
後涉遷闕

晉束皙字廣微祖混隴西太守父龕馮翊太守並有名
皙博學多聞與兄璆俱知名郡界大旱皙為邑人

請雨三日而雨衆歌曰東先生通神明請天三日甘雨
零我黍以育我稷以生何以疇之報東長生 轉著
作佐郎觀汲冢竹書隨疑分釋皆有義證 遷尚書
郎 言三日曲水之義賜金五十斤

谷 九百五九

姓纂漢衛司馬谷吉代居長安生永

前漢谷永字子雲長安人博學經書為太常丞數上疏
得失 舉方正直言極諫之士永待詔公車對者數

人永為上第擢光祿大夫 陰附王鳳 善言災異
前後所上四十餘事專攻上身與後宮

北史谷渾字元沖父袞彎弓三百斤勇冠一時仕慕容
垂位廣武將軍 渾任俠好氣晚折節授經業 道

武時以善隸書為內侍左右渾正直有操行性不苟
合然愛重舊故不以富貴驕人在官廉直為太武所
器重 子闡字崇基位外都大官 子穎位太府少
卿 子士恢字紹達位鴻臚少卿

谷那律昌樂人淹識羣書褚遂良嘗稱為九經庫遷弘
文館學士從太宗獵遇雨沾漬因問曰雨衣若為而
無漏耶對曰以瓦為之當不漏帝悅其直賜帛二百
段孫倚相仕為秘書省正字子崇義為幽州大
將遂客薊門生子從政歷定州刺史封清江郡王

續

九百六十

急就篇注續氏晉大夫續簡伯之後

韓子若夫許由續牙云云此十二人者皆上見利不喜

下臨難不恐或與之天下而不取

麴

九百六一

姓纂鞠氏之後至漢鞠譚生閔避難溫中因居焉改姓麴氏 閔居西平十一代孫嘉仕沮渠氏

晉麴允金城人與苻氏世為豪族西州為之語曰麴與苻牛羊不數頭南開朱門北望青樓 愍帝即尊位以允為尚書左僕射領軍持節錄尚書事時劉曜殷凱等衆逼長安允擊破之擒凱於陣允為大都督驃

騎將軍 帝至平陽為劉聰幽辱允伏地號哭不能
起發憤自殺聰嘉其忠烈贈車騎將軍諡節愍

北史麴珍字舍洛西平酒泉人壯勇善騎射 以帳內
從神武封安康郡王

曲 九百六二

姓纂晉穆侯封少子成師於曲沃支孫氏焉漢有代
郡太守曲證

唐曲環陝州安邑人少喜兵法資勇敢善騎射天寶中

從哥舒翰討吐蕃 與諸將討史朝義平河北累轉
金吾大將軍 大厯中數破吐蕃奏功 李希烈陷
汴州時環守寧陵戰於陳州斬獲甚衆希烈平改陳
許節度使州比為寇衝環勤身節用寬賦歛簡教條
不三歲歸附者襁係

伏
九百六三

姓纂伏羲風姓之後子孫氏焉與任宿須句顓臾同
祖

史記伏生

張晏曰伏生名勝

濟南人也為秦博士文帝時聞伏

生治尚書時年九十餘老不能行使鼂錯往受之

後漢伏湛字惠公琅邪人父理為當世名儒以詩授成

帝別自名學 湛性孝友少傳父業教授數百人

光武徵拜大司徒封陽都侯 智畧謀慮朝之淵藪

清靜無競東州號為伏不鬪 子隆字伯文少以

節操立名拜太中大夫 使張步步欲留隆隆不聽

帝曰隆可謂有蘇武之節

伏恭字叔齊父黯字雅文明齊詩恭少傳父學除劇令
以惠政公廉聞遷常山太守敦修學校教授不輟由
是北州多為侯氏學 肅宗以為三老

晉伏滔字玄度有才學少知名武帝嘗會於西堂滔豫
坐還下車先呼子系之謂曰百人高會天子先問伏
滔在坐否此故未易得 官至游擊將軍著作郎

南史伏曼容字公儀善老易為南海太守至石門作貧
泉銘後拜中散大夫 子暄字玄曜仕梁為永陽內

史為郡廉潔政務安靜徙新安太守賦稅不登者

輒以太守田畧助之推薦後來嘗若不及子挺

字士標

服

九百六十四

姓纂周內史叔服之後以王父為氏漢有江夏太守

服闕

後漢服虔字子慎滎陽人少以清苦建志入太學有雅

才善著文作春秋左氏傳解舉孝廉後拜九江太

守

鹿

九百六五

姓纂趙大夫食采五鹿因氏焉漢有巴郡太守鹿旗
子孫因家巴

北史鹿念字永吉父生再為濟南太守有政績獻文嘉
其能特徵赴季秋馬射賜以驄馬加以青服彰其廉
潔念好兵書陰陽釋氏之學後為黃門侍郎雖任通
顯志在謙退布衣糲食孝莊嘉其清潔時復賜以錢

帛

叔

九百六六

姓纂魯桓公子叔牙之後又八凱叔達之後或云晉
大夫叔向之後 東觀漢記光武時壯武將軍叔壽
左傳僖七年管仲曰鄭有叔詹堵叔師叔三良為政未
可間也

昭二年叔弓聘於晉報宣子也晉使使郊勞辭曰寡君
使弓來繼舊好敢辱郊使叔向曰子叔子知禮哉

牧 九百六七

黃帝臣力牧之後漢有越雋太守牧良

宓 九百六八
亦作伏

宓犧之後仲尼弟子宓不齊字子賤魯人今轉為密氏

祿 九百六九

風俗通云殷紂子武庚字祿父之後以王父字為氏

鞠 九百七十

后稷生不窋不窋生鞠有文在手曰鞠支孫氏焉

竹 九百七一

孤竹君姜姓殷湯封之遼西令支至伯夷叔齊子孫以

竹為氏焉

竺 九百七十二

本天竺胡人後漢歸中國而稱竺氏

木 九百七十三

端木賜之後因避仇改姓木氏晉文章志有木華字玄

虛作海賦為太傅楊駿主簿

沐 九百七四

端木賜之後避難改為沐氏漢有陳郡太守沐寵

穀 九百七五

春秋穀伯國在南郡筑陽縣北子孫以國為氏漢有穀

思為魯相

濮 九百七六

大夫食采於濮因氏焉

蕭 九百七七

周文王子邲叔之邲肅公以謚為姓梁有吳郡太守肅
正德 一云古肅慎氏之後歸化於中國改姓為肅
氏

肅 九百七八

漢有雁門太守肅何

王 九百九九

黃帝時公王帶造合宮明堂見尸子後改為王氏後漢有
司徒王光府字文伯

鬻

九百八十

祝融之後周文王師鬻熊受封於楚著鬻子鬻奉其後也

新序鬻拳楚之閭者也諫而自刎

郁

九百八一

魯國國語云魯相郁貢子孫因居之

僕

九百八二

周禮僕人氏之後

逯 九百八三

風俗通後漢大司空逯石趙有逯明唐夏官郎中逯仁

傑

頊 九百八四

風俗通云顓頊之後

燭 九百八五

左傳鄭大夫燭之武之後

沃 九百八六

風俗通云殷王沃丁之後 吳郡神仙傳沃焦吳人

督

九百八十七

大夫華督之後以王父字為氏 風俗通漢有督瓚晉

有督戎樂盈臣

粟


九百八十八

有治粟都尉因為姓魏志魏郡太守粟舉

蓐

九百八十九

風俗通蓐收之後



名賢氏族言行類稿卷四十九

欽定四庫全書

子部

名賢氏族言行類稿卷

五十三

詳校官典籍臣潘奕雋

主事臣祁韻士覆勘

總校官進士臣朱鈐

校對官中書臣張曾炳

謄錄監生臣王宮

欽定四庫全書

名賢氏族言行類稿卷五十

宋 章定 撰

樂

九百九十

姓纂宋微子之後戴公生公子衍字樂父子孫以王
父字為氏

左傳襄九年宋樂喜為司城以為政使樂遄庀刑器
昭二十二年宋樂祁為司城樂大心為右師樂輓為大

司寇以靖國人

宣十二年楚許伯御樂伯攝叔為右以致晉師樂伯曰吾聞致師者左射以散代御執轡御下兩馬掉鞅而還成十五年華元使向戌為左師樂裔為司寇以靖國人文七年宋樂豫為司馬昭公將去羣公子樂豫曰不可公族公室之枝葉也

孟子樂正子見孟子曰克告於君君為來見也嬖人有臧倉者沮君君是以不果來也

新序樂毅合連四國之兵以伐齊大破之遂屠七十餘城

史記樂毅其先祖曰樂羊羊為魏文侯將毅使燕燕王以為亞卿後為上將軍并護趙楚韓魏燕之兵伐齊下齊七十餘城封為昌國君

樂間毅之子復為昌國君樂乘樂間之宗也在趙封為武襄君樂叔乘之孫也高帝封之樂鄉號曰華成君樂氏之族有樂瑕公樂臣公

後漢樂恢字伯奇為功曹選舉不阿請託無所容入為
尚書僕射諸所刺舉無所迴避

魏志樂進字文謙陽平衛國人以膽烈從太祖 武力
既弘計畧周備奮彊突固無堅不陷自援枹鼓手不
知倦遷右將軍 子緄果毅有父風至揚州刺史

晉書樂廣字彥輔涑陽人王戎舉為秀才裴楷薦辟太
尉掾轉太子舍人尚書令衛瓘見而奇之曰此人之水
鏡見之瑩然若披雲霧而覩青天 累遷侍中河南

尹為政無當時功譽每去職遺愛為人所思 王澄
等任放為達廣曰名教內自有樂地何必乃爾

南史樂鵠字蔚遠廣六世孫 仕梁累遷御史中丞性
公彊居憲臺甚稱職 子法才字元備幼有美名沈
約曰法才實才子為建康令不受俸秩比去將至百
金縣曹啓輸臺庫梁武嘉其清節曰可以為百城表
矣歷少府卿

孝義樂頤之字文德父亡水漿不入口數日仕至郢州

中從事 樂預字文介亦至孝父亡悲感悶絕後為
永世令人懷其德

北史樂運字承業涉獵經史事母以孝聞仕周除萬年
縣丞抑挫豪右號稱強直為露門學士 常願處一
諫官從容諷議發憤錄夏商以來諫爭事集而部之
名曰諫苑奏上隋帝嘉焉

儒林樂遜字遵賢受孝經論語詩書禮易左氏春秋周
文召遜教授諸子在館六年與諸儒分授經業

宋朝樂史字子正撫州宜春人也母夢異人令吞五色珠而生史史有文辭初仕江南歸朝舉進士知陵州獻金明池賦召為三館編修子黃目舉進士官至給事

卓 九百九一

姓纂史記蜀郡卓氏用鐵冶致富即鐵山鼓鑄至僅千人田池射獵之樂擬於人君

後漢卓茂字子康南陽人父祖皆至郡守習詩禮及

歷算稱為通儒 為密令吏人親愛不忍欺之道不
拾遺蝗不入界 光武即位先訪求茂以為太傅封

褒德侯

倭

九百九二

列仙傳有倭仝

角

九百九三

漢初商山四皓有角里先生後漢有角若叔

濁

九百九四

史記胃脯簡微耳濁氏連騎

畢

九百九五

姓纂周文王第十五子畢公高之後以國為氏

左傳閔元年卜偃曰畢萬之後必大萬盈數也魏大名也
以是始賞天啓之矣天子曰兆民諸侯曰萬民今名之大
以從盈數其必有衆初畢萬筮仕於晉遇屯之比辛廖占之曰吉

僖二十四年富辰曰周公封建親戚以蕃屏周畢元鄆

郇文之昭也

晉書畢卓字茂世新蔡人爲吏部郎比舍郎酒熟卓因醉盜飲之嘗曰得酒滿數百斛船四時甘味置兩頭右手持酒杯左手持蟹螯拍浮酒船中便足了一生矣

北史畢衆敬仕宋位太山太守仕魏爲兖州刺史篤於氣類深有國士之風子元賓少豪俠有武幹復拜兖州刺史曾孫義雲累遷都官尚書郎中文宣時

除書侍御史 衆敬弟衆愛

唐畢誠字存之夜燃薪讀書母卹其疲奪火使寐不肯
息遂通經史工辭章性端慤不妄交舉進士書判拔
萃連中 累官駕部倉部郎故事要家勢人以倉駕
二曹為辱誠沛然如處美官無異言 党項擾河西
宣宗嘗召訪邊事誠援古今條破羌狀甚悉帝悅曰
吾將擇帥不意頗牧近在禁庭即除邠寧節度河西
安撫使誠到軍羌人皆順置屯田收穀三十萬斛以

省度支經費 懿宗立以禮部尚書同平章事 吏
術尤長既貴所俸祿養護宗族之乏無間然

畢構字隆擇河南人六歲能文擢進士第為潤州刺史

政有惠愛 李傑為河南尹與構一時選世謂畢李

復為益州長史按察劍南振弊柅私號為清嚴睿

宗嘉構修潔獨行有古人風其治術又為諸使最賜

璽書袍帶

宋朝畢士安字仁叟代州雲中人也後居鄭州舉進士

真宗為開封尹以士安為判官東宮建兼右庶子
真宗即位即令士安攝府事李沆薨中書闕宰相乃
拜士安吏部侍郎參知政事入謝真宗曰未也行且
相卿士安曰寇準方正慷慨有大節朝臣罕出其右
如準者陛下所宜用也真宗亦欲相準藉士安宿德
以鎮之不閱月與準並相 真宗幸澶州歲遺遼銀
絹三十萬是時朝論皆以為過士安曰不如此彼所
顧不重和事恐不能久衆未為然也然自景德以來

百有餘年自古和好所未嘗有議者以士安之言為得焉薨謚文簡 子世長官至衛尉卿 孫從古尚書駕部郎 曾孫四人仲偃字希言以清德聞與郡亦有聲少與蔡京錢塘同官京持國柄二十餘年不以一字通積官朝議大夫享年八十六無病坐亡

仲衍字夷仲舉進士中第為中書檢正奉使契丹宴射連破的衆驚異之以祕閣校理同知太常禮院為官制局檢討官制文字千萬計區分損益曲盡其當

高麗使入貢詔館之上元夕宴東闕下作詩誦聖德
神宗次韻賜馬擢起居郎 仲游字公叔與仲衍同
登第元祐初為軍器衛尉丞召試學士院蘇軾異其
文擢為第一提點河東路刑獄太原銅器名天下獨
不市一物懼人以為矯也且行買二茶匕而去韓縝
曰如公叔可謂真清矣入為吏部郎中言孔子廟自
顏回以降皆爵命冠冕居正而子鯉孫伋乃野服幅
巾以祭為不稱詔皆追侯之仲游為文切於事理而

有根柢不為浮夸詭誕 仲愈字將叔歷國子監丞
坐兄仲游陷黨籍例廢黜徽宗曰畢仲衍被遇先帝
可除罪籍以仲愈為都官郎中擢祕書少監

鄧 九百九十六

風俗通鄧殷時侯國也子孫氏焉漢鄧都之後居河
東

史記酷吏鄧都楊人也孝景時都為中郎將敢直諫面
折大臣於朝濟南睢氏宗人三百餘家豪猾二千石

莫能制景帝拜都為濟南太守至則族滅閻氏首惡
餘皆股栗 問遺無所受請寄無所聽 遷為中尉
行法不阿貴戚列侯宗室見都側目而視號曰蒼鷹
後漢鄧暉字君章隱於弋陽山中志在從政喟然嘆曰
天生俊士以為人也舉孝廉為上東城門侯帝出獵
夜還暉拒關不開後為長沙太守 子壽字伯孝善
文章以廉能稱舉孝廉遷冀州刺史時冀部諸王賓
客放縱壽按之無所容貸 遷尚書令朝廷每有疑

議常獨進見肅宗奇其智策擢為京兆尹強豪震竦
各相檢救莫敢干犯

吉 九百九十七

姓纂黃帝之胤伯儵之後一云尹吉甫之後以王父
字為氏

晉忠義吉挹字祖冲祖朗為御史中丞西朝傾覆隕身
守節 挹亦忠節

南史吉士瞻字梁容少有志氣仕梁為直閣將軍出為

西陽武昌二郡在郡清約家無私蓄

循吏吉翰字休文為益州刺史在任著美績甚得方伯

體

孝義吉盼字彥霄幼有孝性後裴儉等連名薦盼以為
孝行純至明通易老教付太常旌舉

唐吉頊洛州人舉進士第擢右肅政臺中丞來俊臣下
獄司刑當以死狀三日不下頊曰俊臣誣殺忠良罪
惡如山國姦賊也由是后斬俊臣

乙 九百九十八

姓纂殷湯字天乙支孫以王父字為氏

北史乙瓌代人也其先世統部落父匹知遣瓌入貢太
武留之瓌善騎射手格猛獸從駕南征勇冠三軍
後為西道都督子乾歸有氣幹頗習書疏尤好兵
法後為秦州刺史有惠政子海字懷仁位至散騎侍
郎海子瑗字雅珍累遷兗州刺史

密 九百九九

風俗通密康公之後以國為氏

栗

一千

栗陸氏之後漢有栗融字客卿

媯

千一

左傳宣三年燕媯夢天使與已蘭注燕媯南燕姓

述

千二

魯大夫仲述之後

帥

千三

狀云本姓師氏避晉景王諱改為帥氏

漆

千四

魯相漆雕開之後單姓漆氏

實

千五

實沉之後

悉

千六

師悉諸之後

恤

千七

晉大夫恤由之後

暨

千二十四
音訖

吳志暨豔字子林吳郡為選曹郎至尚書

唐天寶中有暨晃弟昱暨佐時上元中准制改姓為周

氏

第

千二十五

左傳有蒍幹胡

邾

千二十六
音弗

漢有九江太守邾修

名賢氏族言行類稿卷五十

欽定四庫全書

名賢氏族言行類稿卷五十一

宋 章定 撰

郭

千二十七

姓纂周文王季弟號叔受封於號或曰郭公因以為
氏公羊傳云號謂之郭聲之轉也左傳齊有郭最燕
有郭隗 郭隗燕昭王築宮而師事之致士先從隗
始

前漢游俠郭解河內軹人

後漢郭賀字喬卿拜荊州刺史百姓歌曰厥德仁明郭
喬卿忠正朝廷上下平 顯宗賜以三公之服黼黻
冕旒勅行部去檐帷使百姓見其容服以章有德

郭丹字少卿買符入函谷關慨然嘆曰丹不乘使者車
終不出關至京師常為都講諸儒咸敬重之更始徵
為諫議大夫持節使歸南陽果乘高車出關

郭伋字細侯後拜潁川太守帝勞曰賢能太守去帝城

不遠河潤九里冀京師并蒙福也 行部到西河童
兒數百騎竹馬迎拜於道次

郭躬字仲孫潁川人為廷尉決獄斷刑多依矜恕乃條
諸重文可從輕者四十一事奏之皆著於令 父弘
為大曹掾用法平諸為弘所決者退無怨情 躬弟
鎮亦至廷尉郭氏數世傳法律子孫至公者一人廷
尉七人侯三人刺史二千石侍中郎將二十餘人

郭泰字林宗母使給事縣庭曰大丈夫焉能處斗筲之

役乎與李膺友善名震京師後歸故里衣冠諸儒送之河上車數千兩林宗唯與膺同舟而濟衆賓望之以為神仙嘗遇雨中一角墊時人故折巾一角以為林宗巾泰聞黨人之死私為之慟曰詩云人之云亡邦國殄瘁漢室滅矣未知瞻烏爰止于誰之屋耳申屠蟠亦歎曰昔戰國之世處士橫議列國之王至為擁篲先驅卒有坑儒燒書之禍今之謂矣司馬溫公曰天下有道君子揚於王庭以正小人之罪而

莫敢不服天下無道君子囊括不言以避小人之禍
而猶或不免黨人生昏亂之世不在其位四海橫流
而欲以口舌救之臧否人物激濁揚清撩虺蛇之頭
踐虎狼之尾以至身被淫刑禍及朋友士類殲滅而
國隨以亡不亦悲乎夫唯郭泰既明且哲以保其身
申屠蟠見幾而作不俟終日卓乎其不可及也

方術郭玉學方診六徵之技為太醫丞

郭憲汝南宋人光武立求天下有道之人徵憲拜博士

嘗從駕南郊忽向東北舍酒三巵詔問其故曰齊國
失火後齊果上火災與郊同日

魏志郭嘉字奉孝陽翟人荀彧薦為司空軍祭酒深通
有算畧達於事從征伐十有一年每有大議臨敵制
變平定天下謀功為高

郭淮字伯濟陽曲人在關右三十餘年功績顯著以淮
為車騎將軍儀同三司進封陽曲侯

晉郭彰字叔茂賈后從舅豫參權勢賓客盈門

郭舒字雅行後為右丞

郭奕字大業為尚書有重名當世朝臣皆出其下

郭象字子玄語如懸河瀉水注而不竭閒居以文論自適任職當權熏灼內外

郭璞字景純博學高才詞賦為中興之冠 洞五行天文卜筮之術

文苑郭澄之字仲靜陽曲人少有才思機敏兼人位至相國從事中郎封南豐侯

隱逸郭琦字公偉晉陽人著書百卷

郭文字文舉河內軹人少愛山水尚嘉遯步擔入吳興餘杭山中無人之地倚木于樹占覆其上而居焉

郭翻字長翔伯父訥廣州刺史父察安城太守 翻少有志操不交世事惟以漁釣射獵為娛

郭荷字承休隱張掖東山謚曰玄德先生

郭瑀字元瑜少有超俗之操隱於臨松薤谷 心與至境冥符志與四時消息

藝術郭磨明易善筮

南史循吏郭祖深仕梁至南津校尉公嚴清刻不避強禦
孝義郭世通居父喪殆不勝哀母亡負土成墳救陂表
門閭改所居獨楓里為孝行焉 子原平字長恭又
稟至行養親必以己力傭賃以供養

隱逸郭希林曾祖翻晉世高尚不仕希林少守家業徵
召一無所就 子蒙亦隱居不仕

北史郭祚字季祐尺牘文章見重於世弱冠為州主簿

孝文初舉秀才嘗飲清微園孝文舉觴曰郭祚憂勤
庶事獨不欺我不勸此人當誰勸也復為吏部尚書
重惜官位至於銓授假令得人必徘徊久之然後下
筆所拔用者皆量才稱職子景尚字思和遷太尉
從事中郎公強當世善事權寵世號曰郭尖

郭彥少知名仕周為澧州刺史勸以耕稼人皆務本

郭衍字彥文少驍武善騎射仕隋以軍功遷大將軍

郭榮字長榮仕隋為內史舍人後拜右侯衛大將軍煬

帝曰誠心純至如郭榮者固無雙矣

孝行郭文恭年踰七十父母喪孝慕罔極尚書聞奏標

其門閭

節義郭世篤字弘乂七世同居大豕同乳烏鵲同巢表

其門閭

唐郭正一定州人永隆中檢校中書侍郎詔與郭待舉
岑倩魏玄同並中書門下承受進止平章事平章事
自正一始永淳中真遷中書侍郎執政久明習故事

文辭詔敕多出其手

郭孝恪許州人少有奇節不治貨產隋亂率少年數百
附李密喜謂曰汝頗多奇士不謬也 竇建德之援
洛也孝恪上謁秦王進計曰王世充力竭計窮其面
縛可跂足待建德悉衆遠來糧餉阻絕殆天亡之也
若固守虎牢以軍汜水隨機應變禽珍必矣王然之
賊平語諸將曰孝恪策擒賊固在諸君右遷上柱國
貞觀十六年改安西都護孝恪推誠撫御盡得其歡

心 子待封

郭震字元振魏州人少有大志十六為太學生家嘗送
錢四十萬會有縲服者叩門自言五世未葬願假以
治喪元振舉與之無少吝一不質名氏薛稷等歎駭
之十八舉進士為通泉尉武后召與語奇之索所為
文上寶劍篇后覽嘉歎 突厥吐蕃聯兵寇涼州后
拜元振都督元振置和戎城自是州無虜憂 神龍
中遷安西大都護睿宗立召為太僕卿將行安西酋

長有旂面哭送者旌節下玉關去涼州猶八百里城中爭具壺漿歡迎 玄宗誅太平公主睿宗御承天門諸宰相走伏外者獨元振總兵扈帝進封代國公少雄邁及貴居處乃儉約手不置書人罕見其喜愠至宰相而親具者唯元振云

郭子儀字子儀華州人以武舉異等累官天德軍使安祿山反詔子儀率本軍東討賊陷常山河北郡縣皆沒會李光弼攻賊常山拔之子儀引軍下井陘與光

弼合破史思明祿山益出精兵佐思明子儀曰彼恃
加兵必易我而心不固戰必克矣於是晝揚兵夜擣
壘賊不得息乃與光弼等擊賊斬首四萬河北諸郡
往往斬賊守迎王師方北圖范陽會天子入蜀太子
即位靈武詔班師子儀與光弼率步騎五萬赴行在
時朝廷草昧軍容缺然及是國威大振 肅宗大閱
六軍鼓而南房琯陳濤師敗帝唯倚朔方軍為根本
至德二載破崔乾祐通關陝路 從元帥廣平王庠

蕃漢兵十五萬收長安河東河西河南州縣悉平以
功加司徒封代國公帝遣具軍容迎灞上勞之曰國
家再造卿力也乾元元年破賊河上執安守忠以獻
遂朝京師詔百官迎於長樂驛帝御望春樓待之進
中書令收衛州圍相州召子儀還更以趙王為天
下兵馬元帥李光弼副之議者謂子儀有社稷功
李光弼失河陽河中太原軍亂朝廷憂二軍與賊
合而少年新將望輕不可用遂以子儀為元帥進封

汾陽郡王屯絳州帝引至卧内謂曰河東一以委卿
至屯誅首惡王元振數十人諸鎮皆惕息 代宗立
梁崇義據襄州叛僕固懷恩陰召回紇吐蕃犯奉天
武功拜子儀為關内副元帥至咸陽賊已過渭水並
南山而東天子跳幸陝子儀還京師子儀自相州罷
歸京師部曲離散及是率騎南收兵得武關防卒及
亡士數千會六軍將張知節迎子儀洛南大閱兵屯
商州威震關中紹曰郭令公來虜懼夜潰破賊書聞

帝以子儀為京城留守自變生倉猝賴子儀復安故天下皆咎程元振羣臣數論奏元振懼乃說帝都洛陽帝可其計子儀曰云云願陛下抑閣寺任直臣委宰相以簡賢任能付臣以訓兵禦侮則中興之功日月可冀帝得奏謂左右曰子儀固社稷臣也朕西決矣乃賜鐵券圖形凌煙閣僕固懷恩誘吐蕃回紇党項入寇朝廷患之詔子儀屯奉天帝問計所出對曰無能為也已而賊遁子儀至涇陽恩賚崇縟進拜尚書

令懇辭不受具所以讓付史館 永泰元年復鎮河
中懷恩盡說吐蕃回紇等三十萬掠涇邠躡鳳翔京
師大震子儀屯涇陽軍纔萬人比到虜騎圍已合子
儀身率鎧騎二千出入陣中回紇怪問是謂誰報曰
郭令公驚曰懷恩言天可汗棄天下令公即世中國
無主故我從以來令公今存天可汗存乎報曰天子
萬壽回紇悟曰彼欺我乎子儀使諭虜回紇曰今誠
存我得見乎子儀將出左右曰狼子野心不可信曰

今力不敵吾將示以至誠即傳呼曰令公來虜皆持
滿子儀以數十騎出免胄見其大酋曰諸君同艱難
久矣何忽亡忠誼而至是邪回紇捨兵下馬拜曰果
吾父也會懷恩暴死羣虜無所統一遂許諾吐蕃疑
之引去子儀遣將白元光大軍繼之破吐蕃十萬於
靈臺西原遂還河中 回紇赤心請市馬萬匹有司
以財乏止市千匹子儀請內一歲奉佐馬直費年八
十五謚忠武配饗代宗廟廷 子儀事上誠御下恕

賞罰必信遭幸臣短毀握兵處外詔至即日就道無
纖介顧望故讒間不行 田承嗣傲狠不軌子儀嘗
遣使至魏承嗣西望拜指其膝謂使者曰茲膝不屈
於人久矣今為公拜 子儀禁無故軍中走馬南陽
夫人乳母之子犯禁都虞候杖殺之諸子泣訴於子
儀且言都虞候之橫子儀叱遣之明日以事語僚佐
而嘆息曰子儀諸子皆奴材也不賞父之都虞候而
惜母之乳母子非奴材而何 宿將數十皆王侯貴

重子儀頤指進退若部曲無幕府六十餘人後皆為
將相顯官其取士得才類此與李光弼齊名而寬厚
得人過之其歲入官俸無慮二十四萬緡前後賜良
田美器名園甲館不勝紀代宗不名呼為大臣以身
為天下安危者二十年校中書令考二十四八子七
壻皆貴顯富貴壽考哀榮終始人臣之道無闕焉子
曜盱眙眊晤暖曙映而四子以才顯 曜性沈靜資
貌瑰傑子儀征伐曜治家事少長無間言以朴簡自

處累遷太子太保卒贈太子太傅 晞善騎射從征

伐有功復兩京出奇兵破賊累進鴻臚卿太子賓客

趙國公 暖尚昇平公主封清源縣侯金紫光祿大

夫遷太常卿子鎡恭遜折節不以富貴加人性周畏

不立赫赫名有諫於上退必毀稿家人子弟無知者

拜右金吾將軍封太原郡公充閑廐宮苑使 曙官

司農卿德宗幸奉天從乘輿擢金吾大將軍終祁國

公

郭承嘏字復卿幼秀異通五經元和中及進士第累遷起居舍人居母喪以孝聞

郭虔瓘齊州人開元初錄軍閥累遷右驍衛將軍

郭知運字逢時瓜州人猿臂虎口以格鬪功累補秦州

三度府果毅從郭虔瓘破突厥有功屯西方戎夷

畏之與王君奭功名畧等時號王郭帝詔中書令張

說紀其功子英傑英乂英傑字孟武英乂字元

武以武勇有名哥舒翰見之曰是當代吾節制者

五代郭崇韜代州雁門人也為河東教練使為人明敏
能應對以材幹見稱莊宗為晉王孟知祥為中門使
崇韜為副使中門之職參管機要先時中門使相繼
獲罪知祥懼求外任莊宗曰公欲避事當舉可代公
者知祥乃薦崇韜為中門使甚見親信 康延孝自
梁奔唐先見崇韜崇韜延之卧內盡得梁虛實延孝
言梁方召諸鎮兵欲大舉唐將皆憂惑以謂成敗未
可知莊宗患之以問諸將諸將皆曰唐得鄆州隔河

難守不若棄鄆與梁西取衛州黎陽以河為界與梁約罷兵無相攻庶幾以為後圖莊宗不悅退卧帳中召崇韜問計崇韜曰陛下興兵仗義將士疲戰爭生民苦轉餉者十餘年矣況今大號已建自河以北人皆引首以望成功而思休息今得一鄆州不能守而棄之雖欲指河為界誰為陛下守之且唐未失德勝時四方商賈征輸必集薪芻糧餉其積如山自失南城保楊劉道路轉徙耗亡大半而魏博五州秋稼不

稔竭民而斂不支數月此豈按兵持久之時乎臣自
康延孝來盡得梁之虛實此真天亡之時也願陛下
分兵守魏固楊劉而自鄆長驅擣其巢穴不出半月
天下定矣莊宗大喜曰此大丈夫之事也即日下令
軍中歸其家屬於魏夜渡楊劉從鄆州入襲汴川八
日而滅梁莊宗推功賜崇韜鐵券拜侍中成德軍節
度使依前樞密使莊宗與諸將以兵取天下而崇韜
未嘗居戰陣徒以謀議居佐命第一之功位兼將相

遂以天下為己任 崇韜素廉自入洛始受賂遺曰
吾豈少比耶今藩鎮諸侯多梁舊將一切拒之豈無
反側且藏予私室何異公帑明年南郊悉獻所藏以
佐賞給累表自陳乞身優詔不允因建天下利害二
十五事施行之 崇韜有大畧已破蜀因遣使者以
唐威德風諭諸蠻欲因以綏來之可謂有志矣

宋朝郭崇應州金城人也初名崇威避周祖諱止稱崇
崇弱冠以勇力應募仕周為陳州節度使同平章事

世宗親征太原崇副符彥卿將行營之師軍還加侍
中移鎮成德世宗征淮甸契丹萬騎掠邊境崇帥師
破之於東鹿斬首數百級俘人口牛羊三萬餘至國
初加兼中書令初太祖受禪崇感周室恩遇或時出
涕為監軍所奏太祖曰我素知崇篤於恩義有所感
激爾遣人覘之還言崇方與賓屬飲博城中晏如也
太祖笑曰果如吾言未幾來朝李重進叛命崇為節
制乾德三年卒 子守璘 守璘子允恭累官至崇

儀副使允恭次女仁宗后也

郭守文并州太原人父暉仕漢為護聖軍使有勇畧從周太祖征河中戰死守文年十四居喪哀毀召隸帳下補左班殿直至國初遣西頭供奉官潘美征嶺南擒劉鋹遣守文馳傳告捷遷翰林副使從曹彬平金陵護送李煜歸闕煜頗自歎守文語之曰國家開拓境土以致太平豈責防風之後至耶煜心遂安雍熙五年大舉北伐為幽州道行營前軍步軍水陸都監

與契丹遇為流矢所中氣色不撓戰益急左右騎從
莫之知也軍中服其量卒謚忠武宇文沉厚有謀頗
知書既卒有使自北邊來言宇文死軍中皆為流涕
太宗問何以致此對曰宇文得俸悉以犒士卒死之
日家無餘財太宗為歎息久之賜其家錢五百萬後
太宗為真宗納守文之次女為夫人即章穆皇后也
追封守文譙王

郭成德順軍中安堡人也少以應募為弓箭手元豐中

大合五道兵趨靈武成將涇原選鋒賊守漫哆隘以拒王師成出奇奮擊之至靈武有番酋介馬馳突統制劉昌祚大破之為涇原第十副將以功遷引進使雄州防禦使涇原路鈐轄轉客省使卒成姿貌豐偉襟度坦然撫養孤窮疎財好施名震西鄙云子浩

郭忠恕字恕先洛陽人也善屬文周太祖召為周易博士國初與監察御史符昭文爭忤朝堂貶乾州司戶

遂不仕進太宗聞其名召為國子監主簿令判定歷代字書忠恕縱酒肆言時政頗有諍議語聞配流登州至齊州臨清謂部送吏曰我逝矣因拊地為穴度容面俯窺焉而卒藁葬道左後數月故人欲改葬但衣衾而已

郭祥正字功父當塗人也其母夢李太白而生祥正少有詩名梅堯臣曰天才如此真太白後身也王安石亦歎美其詩舉進士知武岡縣致仕居姑熟後復出

為通判汀州後知端州復棄去遂家於當塗之青山
郭贄字仲儀襄邑人舉進士中首薦知荆南府屬久
旱方盛陳禱雨之具贄至悉投之江不數日大雨

真宗嘗稱贄純厚長者特拜工部尚書翰林侍讀學
士作詩賜之有啓發冲言曉典常之語卒謚文懿

霍 千廿八

姓纂周文王第六子霍叔處之後今河東有霍邑是
其故都子孫以國為氏

左傳僖公三十四年富辰曰昔周公封建親戚以蕃屏周
管蔡邲霍文之昭也

襄公三十九年叔侯曰虞虢焦滑霍楊韓魏皆姬姓也晉
是以大

前漢霍去病為驃姚校尉斬捕過當封冠軍侯進驃騎
將軍 凡六出擊匈奴斬首捕虜數萬餘級 上欲
教之孫吳兵法曰顧方畧何如耳不至學古兵法
上為治第曰匈奴不滅無以家為也

霍光字子孟去病弟河東平光乃以兄任為郎出入禁
近二十餘年未嘗有過後為大司馬大將軍受遺詔
輔少主 為人沉靜詳審白晢疎眉目美鬚髯每出
入殿門止進有常處不失尺寸天下想聞其風采
廢昌邑立宣帝封博陵侯 定萬世策以安社稷
後漢霍諝字叔智魏郡人明經舉孝廉入為尚書僕射
蜀志霍峻字仲邈南郡枝江人為梓潼太守卒 子戈
字紹先為中庶子甚得切磋之體

晉隱逸霍原字休明慕道清虛方成奇器以賢良徵不
到

郝
千廿九

姓纂出於赫胥氏太昊氏之佐也殷帝乙時王子期
封太原郝鄉因氏焉

南史孝義郝道福累世同爨詔表門蠲役調

世說郝隆七月七日出日中仰卧曬腹中書

唐郝處俊安州人好學嗜漢書貞觀中第進士高麗叛

詔副李勣為總管賊遽至處俊安餐不顧密昇料精
銳擊之虜卻衆壯其謀 諫二王角勝帝遽止曰處
俊遠識非衆臣所逮 諫帝欲遜位武后事遂沮
處俊臨事敢言在帝前議論必傳經義凡所規獻得
大臣體武后惡之以其操履無玷不能害之與許圜
師同里俱官達故時語曰貴如郝許 孫象賢

郝廷玉驍勇善鬪為李光弼愛將及保河陽擒徐璜王
封安邊郡王 吐蕃犯京畿屯渭橋魚朝恩聞其善

布陣請觀之廷玉申號令鳴鼓角部伍坐作進退若一朝恩
歎曰吾處兵間今始識訓練法 累為秦州刺史

郝玘貞元中為臨涇鎮將在邊積三年每討賊不持糗
糧取之於敵獲虜必剗剔其屍虜人畏道其名以
怖啼兒

駱 千三十

姓纂姜姓齊太公之後有公子駱以王父字為氏

吳志駱統字公緒會稽人父俊字孝遠有文武才察孝

廉補尚書郎統為建忠郎將封新陽侯

南史駱文牙字旗門年十二相者云此即容貌非常必將遠致陳文帝引為將帥勇冠衆軍

唐駱賓王義烏人七歲能賦詩武后時數上疏言事下臨海丞不得志棄官去與王勃楊炯盧照隣皆以文齊名天下

莫
千三十一

姓纂漢有富人莫氏見游俠傳大厯中比部員外郎

莫藏用 河南官氏志邢莫氏改為莫氏

北史莫含魏穆愛其才器常參軍國大謀卒於左將軍

子顯為左常侍 顯子題為大將以功賜爵東宛

侯 題弟雲好學善射道武時常典選曹遷執金吾

參軍國謀議

索 十三十二

姓纂殷人七族索氏之後望燉煌晉索湛為北地太

守

晉索靖字幼安湛之子少有逸羣之量與汜衷張彪索
紉索永俱詣太學馳名海內號稱燉煌五龍 舉賢
良對策高第張勃表靖才藝絕人宜在臺閣擢尚書
郎以善草書知名 除雁門太守

藝術索統字叔徹善占夢

統占之云云君當為人

隱逸索襲字偉祖虛靖好學不應州郡之命陰澹曰索
先生碩德名儒真可以諮大義宅不彌畝而志忽九

州形居塵俗而棲心天外謚玄居先生

北史索敞字巨振燉煌人入魏以儒學為中書博士貴遊
之子皆敬憚威嚴多所成益

鄂

千三十三

晉鄂侯之後子孫氏焉漢初功臣安平侯鄂千秋沛人

落

千三十四

風俗通云皋落氏翟國也以國為姓見左傳漢有落下

閭巴郡人撰太初歷

洛

千三十五

落
下
閔
或
作
洛

恪

千三十六

晉有郎中令恪啓

薄

千三十七

風俗通衛賢人薄疑

幕

千三十八

風俗通舜祖幕支孫以王父字為氏見左傳

作
千三九

漢古今人表胙侯子孫因避地改作氏漢涿郡太守作

顯

鐸
千四十

晉有鐸遏寇楚有太傅鐸椒漢有廷尉鐸政

閣
千四十一

急就章有閣并訢唐有御史閣輔

博
千四十二

風俗通云漢有博子勞善相馬望出淮南廣平

藥

千四十三

漢有南陽太守藥崧

約

千四十四

古賢人約續

若

千四十五

古賢人若士

郡

千四十六

風俗通春秋時郡國以國為氏

名賢氏族言行類稿卷五十一

欽定四庫全書

名賢氏族言行類稿卷五十二

宋 章定 撰

石 千四七

姓纂衛大夫石碣之後又石鮐仲衛大夫生石和子
見左傳禮記

左傳隱元年石碣曰臣聞愛子教之以義方弗納於邪
五年君子曰石碣純臣也

閔二年狄人伐衛衛公與石祁子決使守曰以此贊國
擇利而為之

僖二十四年鄭伯與孔將鉏石甲父省視官具於汜而
後聽其私政禮也

昭三十二年王使富辛與石張如晉請城成周

史記石作蜀字子明孔子弟子

萬石君名奮趙人姓石氏高祖召其姊為美人以奮為
中涓徙家長安戚里孝文時至太中大夫選為太子

太傅孝景立以為九卿迫近憚之徙為諸侯相長
子建次甲次乙次慶皆以馴行孝謹官皆至二千石
號奮為萬石君萬石君家不言而躬行建老白
首萬石君尚無恙為郎中令每五日洗沐歸謁親取
親中帟廁踰身自澣洒慶為太僕御史上問車中
幾馬慶以策數馬畢舉手曰六馬後為太子太傅遷
御史大夫為丞相封牧丘侯揚子孝至篇石奮石
建父子之美也

循吏石奮楚昭王相也堅直廉正無所阿避

前漢石顯字君房為中書令貴幸傾朝持詭辯以中傷
人公卿以下畏之重足一迹 與牢梁五鹿充宗結
為黨友民歌之曰牢邪石邪五鹿客邪印何累累綬
若若邪言其兼官據勢也

晉石苞字仲容儀貌偉麗時語曰石仲容姣無雙有經
國才畧歷東萊琅邪太守所在皆有威惠終於司徒
掾 子崇字季倫諂事賈謐望塵而拜 與貴戚王

愷爭以奢靡相尚起金谷別館作錦步障五十里

石鑒字林伯為御史中丞多所糾正朝廷憚之

隱逸石坦字洪孫不娶妻妾不營產業

鄭休妻石氏少有德操年十餘歲鄉邑稱之既歸鄭氏
為九族所重

北史節義石文德祖父苗縣令黃宣在任喪亡苗以家
財殯葬自苗逮文德刺史縣令卒官者皆服制盡禮
五世同居閨門雍睦詔標門閭

節義石祖興太守田文彪縣令和真等喪亡祖興自出家絹二百餘疋營護喪事孝文嘉之賜爵一級為上造

唐石洪字濬川其先姓烏石蘭後獨以石為氏有至行舉明經歸東都十餘年隱居不出重脩鎮河陽求賢者以自重乃具書幣邀辟後詔書召為集賢校理韓昌黎送石洪赴河陽叅謀序云先生居嵩卽瀍穀之間冬一裘夏一葛朝夕飯一盂蔬一盤問之仕則不

應坐一室左右圖書與之語道理辨古今事當否論
人高下事後當成敗若河決下流而東注若駟馬駕
輕車就熟路而王良造父為之先後也若燭照數計
而龜卜也

石雄徐州人敢殺善戰氣蓋軍中會昌初回鶻入寇雄
佐劉沔屯雲中雄選沙陀雜虜三千騎夜發直擣烏
介帳追至殺虎山斬首一萬級李彥佐討劉稹以
雄為副使破賊五壁賊大震雄臨財廉每朝廷賜

與輒置軍門自取一匹縑餘悉分士伍武宗喜曰今將帥義而勇罕雄比者初雄討積水次見白鷺謂衆曰使吾射中其目當成功一發如言

宋朝石熙載字凝績洛陽人也周時舉進士太宗征河東從至鎮州遷給事中樞密副使未幾拜戶部尚書樞密卒謚元懿子中立字表臣年十三喪父朝廷以中立為供奉官十八獻文改光祿寺丞遷殿中丞家富於財悉推與諸父久之除直集賢院累擢

知制誥翰林學士景祐四年拜參知政事遷吏部侍郎以太子少傅致仕遷少師卒謚文定

石普其先幽州人也自言唐河中節度使雄之後自其曾祖徙居太原父通給事太宗于晉邸普方十歲亦留邸中補寄班祗候以督捕盜賊功轉內殿崇班帶御器械普有膽畧聞敵所在即馳赴親冒矢石前後戰未嘗少衄通兵書及陰陽六甲星厯推步之術太宗嘗令善工製金帶普帶御器械輒面求賜

太宗解以賜之後雖謫廢當太宗忌日必舉族詣佛寺齋薦歲以為常

翟千四八

姓纂黃帝之後代居翟地國語云翟國為晉所滅齊有翟樓後魏翟黃漢文帝時廷尉翟公下却人

新序魏文侯與士大夫坐問曰寡人何如君也皆曰君仁君也翟黃曰君非仁君也文侯怒問任座對曰君仁君也子何以言之對曰臣聞之其君仁者其臣直

向翟黃之言直是以知也文侯曰善復召翟黃為上卿

前漢翟方進字子威汝南上蔡人受春秋以射策甲科為郎遷朔方刺史居官不煩苛所察應條輒舉甚有威名徙京兆尹搏擊豪強京師畏之事後母甚篤

知能有餘兼通文法吏事以儒雅緣飭法律號為通明相天子甚器重之奏事亡不當意少子義為東郡太守

翟公為廷尉賓客闐門既罷門外可放雀羅後復為廷尉賓客欲往公為大書其門曰一死一生乃知交情一貧一富乃知交態一貴一賤交情乃見

後漢翟酺字子超廣漢人善圖緯天文厯筭四世傳詩酺好老子遷侍中拜尚書為酒泉太守斬叛羌九百級威名大震遷將作大匠損省經用歲息四五千萬請修繕太學學者為立碑銘

晉隱逸翟湯字道深篤行純素不屑世事人有饋遺雖

釜庾一無所受 寇聞其名德皆不敢犯鄉鄰賴之
徵為國子博士不起 子莊字祖休少以孝友著
名遵父之操不交人物語不及俗公車徵不就 子
矯亦有高操屢辭辟命 矯子法賜徵亦不至世有
隱行

北史孝行翟普林事親以孝聞躬耕色養鄉閭謂為楚
丘先生父母喪廬墓負土成墳有二鵲巢其廬前栢
樹入廬馴狎司隸奏其孝感擢孝陽令

五代翟光鄴字化基濮州鄆城人也年十歲為晉兵所掠明宗愛其穎悟常以自隨光鄴事唐官至耀州團練使周太祖入立拜宣徽使樞密副使出知永興軍卒於官光鄴為人沈默多謀事繼母以孝聞雖貴不營財產嘗假官舍以居蕭然僅蔽風雨雍睦親族簾衣糲食與均有無而光鄴處之晏然日與賓客飲酒聚書為樂其所臨政務以寬靜休息為意

卻千四九

姓纂晉大夫卻文生豹豹生芮芮生缺缺生克克生
代為晉卿又卻犍卻至亦其族也漢有侍中卻璠
左傳僖二十七年晉蒐於被廬作三軍謀元帥趙衰曰
卻縠可乃使卻縠將中軍卻縠佐之

新序晉文公將伐鄆趙衰陳所以勝鄆文公用之而勝
賞衰衰曰臣聞之卻虎賞卻虎

蜀志卻正字令先博覽傳籍弱冠能文澹於榮利而耽
意文章終巴西太守

晉郗詵字廣基博學多偉畧倜儻不拘細行舉賢良對武帝曰臣猶桂林之一枝崑山之片玉為左丞累遷

雍州

白 千五十

姓纂黃帝之後秦大夫白乙丙楚有白公勝楚平王太子建之子也

史記白起郿人善用兵事秦昭王為左庶長攻韓魏趙楚遷為武安君

史記貨殖白圭周人樂觀時變人棄我取人取我予趨利若
猛獸擊鳥之發天下善治生者祖白圭

北史白建字彥舉仕齊歷都官尚書雖無它才伎勤於
公以溫柔自處以典執兵馬致位卿相

唐白居易字樂天其先太原人徙下邳敏悟絕人工文
未冠謁顧況況曰吾謂斯文遂絕今復得子矣貞元
擢進士拔萃皆中補校書郎元和元年對制策一等
召入翰林為學士遷左拾遺四年旱甚居易建言

乞盡免江淮兩賦以救流瘠 王鏐將加平章事居易以宰相天下具瞻非重望不可王鏐以誅求為羨餘因假之名器四方聞之謂陛下得所獻與宰相

王承宗叛帝詔吐突承璀率師出討居易諫中人為制將四方聞之益輕朝廷後諸軍討王承宗者久無功居易上言其害有四可為痛惜者二可為深憂者二 俄有言居易毋墮井死而居易賦新井篇 後為司門員外郎知制誥穆宗好畋遊獻續虞人箴以

諷 轉中書舍人田布遺五百縑辭不受 河朔亂

詔諸道出兵遷延無功居易上言雖進忠不見聽

遷杭州刺史築堤捍錢塘溉田千頃復浚李泌六井

民賴甚溥 以刑部尚書致仕卒宣宗以詩弔之

居易被遇憲宗時事無不言洎別扶摩多見聽可為

當路所忌乃放意文酒 與弟行簡從弟敏中友愛

東都所居疏沼種樹構石樓香山鑿八節灘自號醉

吟先生為之傳暮節惑浮屠至經月不葷稱香山居

士嘗與胡杲吉旼等九人燕集皆高年不仕者人慕之繪為九老圖 居易於文章精切最工詩以規諷得失當時人爭傳雖林行賈售其國相率篇易以一金其偽者能辨之初與元稹酬詠故號元白又與劉禹錫齊名號劉白其始生七月能展書姆指之無兩字雖試百數不差九歲暗識聲律其篤於文章蓋天稟然 葛常之侍郎云樂天賦有八章其六章託弱柳櫻桃枳橘杜黎野葛水榭凌霄諷在位與附麗權

勢者其八章則曰有木名丹桂云云蓋樂天自謂也
樂天素善李紳而不入德裕之黨素善僧孺楊虞卿
而不入宗閔之黨素善劉禹錫而不入伾文之黨中
立不倚峻節凜然於八木之中而自比於桂殆未為
過也

白敏中字用晦第進士辟李德裕府一見許其遠到高
元裕薦為侍御史轉左司員外郎武宗時李德裕惡
居易薦敏中文詞類兄且有器識召入翰林為學士

後入相武宗崩德裕失勢敏中竭力排之德裕遂貶

崖州司戶

席千五一

姓纂本姓籍晉大夫籍談之後也談十三代孫瓌避
項羽名改席氏漢初徙關東豪族席氏徙安定臨涇
南史席闡文梁武帝受禪除都官尚書出為東陽太守
在郡有能名冬至悉放獄中囚依期而至

北史席法友仕魏歷華并二州刺史後為別將出淮南

欲解朐山之圍及渡淮而朐山敗終光祿大夫

席固字子堅為襄陽著姓少有遠志歸魏拜使持節驃

騎大將軍除昌州刺史

子雅字彥文性方正少以

孝聞位大將軍

唐席豫字建侯襄州人長安中舉學兼流畧詞擅文場

科擢上第時年十六以父喪罷復舉手筆俊拔科中

之俄舉賢良方正異等復舉超拔羣類科遷考功員

外郎韓休輔政舉代已入拜吏部侍郎典選六年拔

舉遠士多至臺閣當時推知人號席公云 凡四以
使者按行清直亡欲當官不為勢權所撼性謹畏與
子弟屬書不作草字帝嘗登朝元閣賦詩羣臣屬和
帝以豫詩最工詔曰詩人之冠冕也

劇千五二

姓纂齊大夫食采於劇因地為姓燕有將劇辛

前漢游俠劇孟洛陽人以俠顯吳楚反周亞夫得孟喜
曰天下騷動大將軍待之若一敵國云

麥 千五三

姓苑云高要始興有此姓

北史麥鐵杖始興人少驍勇走及奔馬好交友重信義
隋萊州刺史無涖政名轉汝南太守稍習法令羣盜
屏迹 除左屯衛大將軍自以荷恩深重每懷竭命
之志遼東之役請為前鋒 子孟才授光祿大夫仲
才季才正議大夫

栢 千五四

風俗通栢皇氏之胄又伯亮父顓頊師栢招帝嚳師
栢罔為周太僕栢國在汝南西平縣為楚所滅子孫
以國為氏

唐栢良器字公亮魏州人父友王與見之曰爾額文似
臨淮王面黑似顏平原殆能立功及薦之光弼年二
十四更戰陣六十二李希烈圍寧陵過水灌之親令
軍中明日拔城良器以救兵至擇弩手善游者沿汴
渠夜入及旦伏弩發賊乘城者皆死錄功封平原郡

王 圖形凌烟閣

栢耆有縱橫學志健而望高王承宗叛耆謁裴度且言
願得天子一節馳入鎮可掉舌下之乃以左拾遺往
既至以大誼動承宗乃請獻三川以二子入質由是
聲震一時 太和初李同捷反耆斬其首以獻

酈 十五五

姓纂黃帝之後支孫食采於酈因氏焉

史記酈商高陽人也漢王賜商爵信成君以將軍為隴

西都尉遷為左丞相號曰涿侯更封曲周侯子寄字
況與呂祿善大臣欲誅諸呂呂祿為將軍軍北軍太
尉勃不得入乃使人劫商令其子況給祿祿信之故
與禹游勃乃入據北軍遂誅諸呂商卒諡曰景侯子
寄代侯天下稱況賣友也

酈生食其陳留高陽人好讀書家貧落魄無以為衣食
業為里監門吏 見高祖長揖不拜 號為廣野君
說齊王罷歷下軍韓信聞生馮軾下齊七十餘城度

兵襲齊王以酈生賣已遂亨之 弟商子齊封高
梁侯更為武遂侯 食其謁高祖自稱高陽賤民又
曰高陽酒徒

後漢文苑酈炎字文勝食其之後有文才解音律言論
給捷多服其能理州郡辟命皆不就

北史酈範字世則父嵩天水太守範仕魏為尚書右丞
青州刺史 子道元字善長為冀州長史後守魯陽
郡表立黌序崇勸學教山蠻伏其威名不敢為寇

道慎字善季位正平太守有能名 道約字善禮性
多造請好以榮利干謁歷東萊魯陽二太守

狄千五六

姓纂周成封少子於狄城因氏焉魯大夫有狄虎彌
古賢人有狄儀仲尼弟子有狄黑衛人漢有博士狄
山

唐狄仁傑字懷英并州人為兒時門人有被害者吏就
詰衆爭辨對仁傑誦書不置吏讓之荅曰黃卷中方

與聖賢對何暇偶俗吏語耶 舉明經調汴州參軍

為吏誣訴閭立本召訊異其才曰仲尼稱觀過知仁

君可謂滄海遺珠矣薦授并州參軍親在河陽登太

行山反顧見白雲孤飛謂左右曰吾親舍其下瞻望

久之雲移乃去 同府參軍鄭崇質母老疾當使絕

域仁傑詣長史蘭仁基請代行仁基咨美其誼每曰

狄公之賢北斗以南一人而已 遷大理丞歲中斷

久獄萬七千人時稱平恕 授侍御史王本立怙寵

自肆仁傑劾其惡朝廷肅然使岐州亡卒數百剽
行人道不通官捕繫紛紛不能制仁傑曰是其計窮
乃明開首原格皆自縛歸帝歎其達權宜帝幸汾
陽宮李沖玄以道出妬女祠更發卒改馳道仁傑曰
天子之行風伯清塵雨師洒道何避邪帝壯之曰真
大丈夫哉出為寧州刺史入拜冬官侍郎持節江
南巡撫吳楚多淫祠凡毀千七百房出為豫州刺
史越王兵敗支黨餘二千人論死仁傑釋其械上疏

曰臣欲有所陳似為逆人申理不言且累陛下欽恤
意表成復毀自不能定然此皆非本惡註誤至此有
詔悉謫戍邊囚出寧州父老迎勞曰狄使君活汝耶
因相與哭碑下囚齋三日乃去至流所亦為立碑初
宰相張光輔討越王軍中恃功多暴索仁傑拒之光
輔怒曰州將輕元帥耶仁傑曰亂河南者一越王公
董士三十萬以平亂縱使暴橫是一越王死百越王
生也如得上方斬馬劍加君頸雖死不恨天授二

年以地官侍郎同平章事武后曰卿在汝南有善政
然有諧卿者欲知之乎謝曰以為過臣當改以為無
過臣之幸也諧者不願知后歎其長者為來俊臣
所構捕送制獄仁傑書帛置褚衣中子光遠持書上
變后召見因免死貶彭澤令通天中契丹陷冀州
河北刺史懼驅民保城仁傑曰何自疲民虜來吾自
辦悉縱就田虜亦引去民愛仰之復為立祠轉幽
州都督賜紫袍龜帶后自製金字十二於袍以旌其

忠 召拜平章事后欲以武三思為太子以問宰相
衆莫敢對仁傑對曰欲以三思為後且姑姪與母子
孰親立廬陵王則千秋萬歲后常饗宗廟三思立廟
不祔姑后感悟即遣迎廬陵王中外大悅時李楷固駱
務整本契丹將後降有司請論如法仁傑稱驍勇可
任貸死至是二人討契丹克之凱旋后舉酒賞其知
人 仁傑所薦張柬之姚崇等皆為中興名臣封梁
國公 子光嗣聖歷初為司府丞武后詔宰相各舉

尚書郎一人仁傑舉之以稱職聞后曰祁奚內舉果得人

狄兼謩字汝諧仁傑孫及進士第剛正有祖風歷三州刺史歲旱發粟賑濟擢給事中遷御史中丞帝曰卿梁公後當嗣家聲

宋朝狄青字漢臣汾州西河人也初隸拱聖軍選為散直元昊叛擇衛士徙邊以青為延州指使青勇於臨敵常為先鋒前後二十五戰中流矢者八每戰飾以

銅面具敵人望之如神以功遷至秦州刺史涇原路
總管仁宗聞其在陝西數戰勝欲召見問其方略
會賊寇渭州仁宗命圖形以進及元昊稱臣西鄙休
兵入為捧日天武四廂都指揮使知延州擢樞密副
使廣源州蠻儂智高反陷邕州進圍廣州時朝廷以
孫沔余靖為安撫使久未奏功仁宗以南方為憂
青慨然請行除宣徽南院使宣撫荆湖南北經制廣
南盜賊事青至合沔靖之兵自桂林次賓州斬廣西

鈐轄陳曙按其遇賊不戰之罪并殷直袁用等三十
二人悉誅之軍士震恐遂下令止具十日糧明日絕
崑崙關出歸仁鋪先布陳成列而賊以覘者誤謂未
即進遂失險乃悉衆逆戰前鋒孫節戰死山下而賊
氣方銳青躬執白旗麾騎兵出其不意賊衆大潰斬
首二千二百級獲偽官五十七人智高夜縱火焚城
而遁詰朝青入按城中獲金帛鉅萬牛馬數千築京
觀於城北隅招復俘脅者七十二百使還其家青還

入朝復為樞密副使遂拜樞密使在樞密府四年言者謂青家數有光怪以護國軍節度使同平章事知陳州未幾而卒謚武襄

戚千五七

姓纂衛大夫食采於戚因氏焉古賢人有戚子著書漢高祖戚夫人生趙王如意功臣表臨轅侯戚鯁傳封七代

南史儒林戚衮字公文吳郡人少聰慧受三禮大義畧

舉兼太學博士為羣儒推許

宋朝戚綸字仲言應天府楚丘人也父同文字文約幼孤事祖母以孝聞從邑人楊慤受經慤隱居不仕而以女弟妻同文遇疾因託以家事同文為葬其三世之未葬者遭世喪亂亦不復仕且思見混一遂以同文為名慤勉之仕同文曰長者不仕同文亦不仕聚徒講學相繼登科者五十六人踐臺閣者亦至十數尚信義善周人之急所與交皆當世之名士楊徽之

因使至郡多所酬倡及卒徽之與其門人謚曰堅素
先生應天府民有曹誠者即同文舊居廣舍百五十
楹聚書千餘卷以延學者真宗嘉之賜名曰應天府
書院云同文長子曰維仕至戶部郎中綸其次子也
篤於古學善談名教舉進士為沂州簿徙知泰和縣
同文卒特詔令起復泰和民險悍好興訟綸為勸民
詩五十篇言近而易曉老幼多傳之

析 千五八

姓纂左傳齊大夫析歸父衛大夫析朱鉏公子黑背
孫也

後漢方術析像字伯式其先張江者封析侯曾孫國為
鬱林太守因封氏焉國有資財二億像幼有仁心及
國卒乃散金帛資產周施親戚 通京氏易好黃老
言

直千五九

史記直不疑南陽人也為郎事文帝同舍有告歸誤持

同舍郎金去金主疑不疑不疑買金償告歸者來而
歸金亡金者大慙以此稱為長者 景帝拜為御史
大夫 封為塞侯

國 千六十

姓纂左傳齊卿族國氏代為上卿 又鄭穆公子發
字子國生輒字子耳生僑字子產以王父字為氏亦
為國氏焉

魏志國淵字子尼曹操辟為司空掾屬每於公朝論議

堂直言正色退無私焉使典屯田事倉庫豐實
遷魏郡太守又遷太僕居列卿位布衣疏食祿賜
散之故舊宗族以恭儉自守太祖以其子泰為郎

翼

千六一

姓纂晉翼侯居翼城因以氏焉

前漢翼奉字少君東海人治齊詩惇學不仕好律歷陰
陽之占以十二律驗人情諸儒薦之以為中郎
因災異上封事上疏諫遷都子孫皆在儒官

伯 千六二

風俗通嬴姓伯益之後

左傳伯宗晉大夫也 梁山崩將召伯宗謀之 伯宗

每朝妻戒之曰盜憎主人民怨其上 伯州犂晉大

夫伯宗子 太宰嚭字子餘姓伯氏州犂之子為吳

太宰

史記伯虔字子析孔子弟子

帛 千六三

姓纂云吳郡人神仙傳有帛和

格 千六四

允格之後漢有御史格班

號 千六五

周王季之子封號號叔子孫以國為姓左傳晉大夫

革 千六六

漢初功臣黃棗侯革朱

鬲 千六七

殷末賢人膠鬲之後以王父字為氏

赫

千六八

風俗通云赫骨氏之後

獲

千六九

風俗通宋大夫猛獲之後以王父字為氏

籍

千七十

晉文侯仇弟陽叔生伯厯司晉典籍遂為籍氏玄孫談

代為晉大夫晉為趙所滅籍氏播於宋

夕 千七一

後漢巴中梁師有夕氏蜀志尚書令夕斌

易 千七二

左傳齊大夫易牙之後魏有易愷晉有易雄

赤 千七三

風俗通帝嚳師赤松子之後見神仙傳

辟 千七四

漢書富人辟子方之後

昔 千七百五

風俗通周大夫封昔因氏焉漢有昔登開元有昔安

射 千七百六

楚大夫觀射父之後見左傳漢有大鴻臚射咸吳有中

書郎射慈善禮喪服

笮 千七百七

漢有笮融丹陽人見吳志

爽 千七百八

召公奭之後避漢元帝諱改姓盛氏

糴 千七九

左傳晉大夫有糴箴

錫 千八十

吳志云漢末有交趾太守錫光古仙人錫壽子之後

激 千八一

左傳齊有太史激 漢書淮南王傳有激章

息 千八二

媯姓國也為楚所滅子孫以國為氏今新息縣即其故地

棘千八三

衛大夫棘子成之後見論語

稷千八四

后稷之後 漢稷嗣君叔孫通支孫亦為稷氏

即千八五

漢單父令即費其先食采即墨因以命氏

職 千八六

周禮職方氏因官為姓漢有山陽令職洪開元有職南

金蔡州人明史記

嗇 千八七

風俗通云古嗇夫子孫因氏焉

力 千八八

黃帝臣力牧之後 漢有魯相力題

食 千八九

風俗通漢有博士食子通

敕
千九十九

後燕合浦公敕勅東夷人

墨
千九十一

孤竹君之後本姓墨台後改為墨氏梁郡戰國時墨翟

宋人著墨子

勒
千九十二

晉鎮南將軍王歆騎督勒蒲討張昌於隋郡

特千九三

左傳晉大夫特宮

名賢氏族言行類稿卷五十二